



Senin, 5 April 2021
Lukas 24: 13-27



Yesus Nemani Perdalanenta



Dua kalak si ercakup-cakap nuriken pendapatna kerna peristiwa si mbaru denga jadi. Peristiwa kematen Jesus e iturikenna alu tangkas sapih ia duana, peristiwa si erbanca ia kecewa, bagi si merawa, bagi si putus asa, ertina penggejapenna seri ras sidebanna si ngarapken Jesus e tetap nggeluh, tetap ngajar, dingen tetap ncidahken kuasaNa. Tapi labo bage si jadi emaka berita kematen Jesus pe mbar guna icakapken asum si e. Perban tutusna ia duana ngerana-ngerana tupung perdalinenna ku Emaus i Jerusalem nari, labo itandaina ise si reh ku tengah-tengahna. Jesus nemani perdalinenna! Iorati Jesus ia duana kai si icakapkenna, janah alu tangkas penurikenna kerna kai si jadi man Jesus e.

Perdalinen ku Emaus jadi model perdalinen kegeluhenta i bas paksa enda. Tutus kal ateta ercakup-cakap kerna Dibata, banci saja secara teori melala si eteh kerna Dibata e, beluh kita nurikenca kerna Dibata e i bas penggejapenta, tapi penandaita kempak Dibata lenga mbages si erbanca labo "sitandai kal ise Dibata siisembah kita e." Terlebih adina iperhadapkan kita ku bas perbeben si paksana ndempar kegeluhenta, tempa la si gejap maka Jesus e tetap nemani perdalinen kegeluhenta. Penggejapen maka Dibata e la ras kita mahanca kita kecewa, sedih, merawa bagepe frustasi. Amin bage gia ola min kita mpedauh dirinta ras rarasen kalak si erkiniteken sabab i bas persadanta e nambah gegehta ngalaken perbeben.

Seh kenca i Emaus, ikatakenna man Jesus gelah tetap min Jesus e ras ia i je. Emaka asum Jesus ras ia i Emaus e "isadarken" Jesus e ia ise kin diriNa si enggo ngarak-ngarak perdalinenna. Kinatana, ibas keadaan panik, mbiar banci kita kurang menyadari kehadiran Jesus. Perukurenta perlu "isadarken" arah kata Dibata bagepe arah pertotonta.

Ieteh Yesus pusuhta



